



# Proklamation



zum Egerchinger' Narrechlapp 1986

D'FASNACHTSGSELLSCHAFT VO EGERCHINGE  
WOTT EUCH E BSUDRI FREUD BRINGE:  
NACH ZÄÄ JOHR, SO HEI D'MANNE G'FUNDE  
WEI SIE E FROU - E LIEBI, RUNDI!

ALS OBERNÄRRIN VOM SÄCHSUNDACHTZG!  
BEGRÜESST EUCH HÜT S'HOSTETTLER GRITTLI!  
"S'GANZE FÜR D'EMANZE" HEISST'S MOTTO HÜR  
DRUM, FROUE, ÜBERNÄHMET DAS STÜR!

BY DE NÄCHSTE WAHLE WIE MIR EUS NÜM BLAMIERE  
UND WÄRDE USSCHLISSLICH FROUE NOMINIERE!  
DERE EINE, WO'S DAS MOL HET G'SCHAFT,  
IHR WÜNSCH IG NO FÜFFZG JOHR CHRAFT.

NU SY D'WAHLE VERBY, DIE GÄÄLE HEI G'WUNNE,  
FÜR DIE SCHWARZE SCHYT WIEDER DIE SCHWARZE SUNNE,  
DIE ROTE HOCKE WIEDER ALLI IM BOOT  
UND WARTE IN "CHRÜTZ"UF'S MORGEROT!

DIE BLAUIPOSCHT I EUSERE G'MEIN  
DUNKT MI ES G'STÄNK VOM KULTURVEREIN!  
LUEG I DRA UFE, WIRD'S MIR CHALT:  
E ALKOHOL - ENTZUGSAASTALT!

DR HÜÜSERMAA LOHT SICH LO VERDRIESSE,  
TUET IHN DR EIGNE DIENSCHT - HUND BYSSE:  
WYL NÄBEDRA DR DOKTOR SCHO WARTET,  
DASS WIEDER E BISSNE SCHROTER STARTET!

DR CHAUF VO DER MÜHLI, SEIT MIR MY GRING,  
ISCH EINISCH EMOL ES VERNÜNFTIG'S DING:  
WYL DR SCHÜLL, DR KURT UND SÄMTLICHE FROUE  
NO USREICHEND PLATZ HEI, IHR'S AESSE Z'VERDAUE!

NUN WOTT IG SCHLIESSE, DENN DIR LACHET EUCH NO CHRANK,  
AM SAMSCHTIG, WENN MIR SINGE D'SCHNITZELBANK!  
JG WÜNSCHE EUCH ALLNE FÜR D'FASNACHT VIEL CHRAFT  
BYM FÄSCHTE, BYM TANZE UND OU BYM TRUUBESAFT!

VERLÄSE UND SIGNIERT AM 5. FEBRUAR 1986 BYM NARRECHLAPP  
Z'EGERCHINGE

Grittli 1